

## A Aquilee al vierç il Sportel Regjonâl pe Lenghe Furlane

Un gnûf pont di riferiment pe promoziun dal furlan in dute la Basse furlane

**AQUILEE** – Al è stât screât a Aquilee il Sportel Regjonâl pe Lenghe Furlane - Basse Furlane. Presints ae inaugurazion, te sede di vie Rome 48, la assessore regjonâl pes finansis **Barbara Zilli**, il sindic de antighe citât romane, **Emanuele Zorino**, e il president de ARLeF - Agenzie Regjonâl pe Lenghe Furlane, **Eros Cisilino**.

«Il servizi che al ufrîs il Sportel – e à declarât la assessore Zilli – al è un segn de atenzion par un teritori dulà che la lenghe e je un element de fuarte apartignince aes lidrîs, ae nestre storie e ae identitât de comunitât furlane, che si manten salde dentri e fûr dai confins regjonâi».

«Vierzi il Sportel Regjonâl pe Lenghe Furlane - Basse Furlane a Aquilee al rapresente une grande oportunitât pal teritori – al à marcât il prin citadin –. Cheste iniziative, domandade cun fuarce de aministrazion che e à firmât un acuardi cu la ARLeF, e contribuîs a dâ ancjemò plui valôr aes nestrîs lidrîs culturâls e a infuartî il rûl de citât di Aquilee te promoziun de ereditât e des tradiziuns che a travanin di secui la zone de Basse. Aquilee vie pe storie e je stade un grant centri culturâl e vuê no podevin no tignî cont dal fatôr linguistic impuartant che lu à caraterizât e che al va indenant a jessi un element di distinziun de identitât de nestre comunitât. Cun operations savintis e resonadis tant che cheste o podin, ducj insiemi, promovi lis nestrîs lidrîs e meti adun un avignî miôr.»

«Cheste scree e à un significât pardabon particolâr – al à marcât Eros Cisilino – stant che e invie une colaborazion sinergjiche tra la Agenzie, midiant dal so Sportel, il Comun di Aquilee e lis realtâts presintis sul teritori, tant che la Fondazion Aquilee. Cheste citât e rapresente in maniere simboliche la scune de identitât furlane e duncje ancje di chê linguistiche, viodût che za Sant Jaroni nus à lassât scrit che Fortunazian, vescul di Aquilee te metât dal Tresinte, al comentave il Vanzeli in lenghe locâl par favorî la comprension di bande dal popul. O ringraciìn pal bon acet il sindic e dute la comunitât di Aquilee, precisant che la ativitât di chest Sportel e cjaparà dentri dute la aree de Basse, là che la identitât e la lenghe a son une vore vivarosis».

I Sportei logâts sul teritori furlan, daûr di ce che al sclarîs in maniere complete ancje il Plan gjenerâl di politiche linguistiche pe Lenghe Furlane 2021-2025, a son un pont di riferiment pai ents locâi par garantî ai citadins l'esercizi plen dai dirits linguistics. I servizis furnîts dai Sportei - finanziâts de Regjon Friûl-VJ, peâts ai fonts de leç 482/1999 de Presidence dal Consei dai Ministris, e afidâts ae ARLeF tant che organisim competent ae lôr gjestion – a tocjin in particolâr la consulente linguistiche e la traduzion scrite dal talian al furlan; la consulente su la toponomastiche e la segnaletiche stradâl, e sul teme de planificazion

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. +39 340 3546890 / Adriana Cruciatti - mob. +39 335 6853775

<<<<<<<<<<<

linguistiche; il supuart intal davuelzi lis ativitâts di promoziun sul teritori; la assistance inte informazion e intal orientament al public.

Il Sportel Regjonâl pe Lenghe Furlane – Basse Furlane al sarà viert al public il lunis des 9.00 aes 13.00 e des 13.30 aes 17.30; martars e vinars des 9.00 aes 13.00, e al rispuindarà al numar 0431 916919 o ae direzion e-mail [basse@sportelfurlan.eu](mailto:basse@sportelfurlan.eu).

Aquilee, ai 12 di Lui dal 2022

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / **e-mail: [arlef@caltpr.it](mailto:arlef@caltpr.it)**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<